



Broj: 04-04-4-1382/26
Sarajevo, 30. 3. 2026. godine

**SAOPĆENJE ZA JAVNOST O OBJAVLJENOM IZVJEŠTAJU REVIZIJE UČINKA
„PRAĆENJE REALIZACIJE PREPORUKA IZ IZVJEŠTAJA
'RODNA RAVNOPRAVNOST I SPREČAVANJE NASILJA NAD ŽENAMA'”**

Ured za reviziju institucija u Federaciji Bosne i Hercegovine proveo je praćenje realizacije preporuka iz Izvještaja revizije učinka „**Rodna ravnopravnost i sprečavanje nasilja nad ženama**”, objavljenog **2023. godine**. Cilj je bio ispitati preduzete aktivnosti i procijeniti u kojoj mjeri su date preporuke realizovane.

Praćenje je obuhvatilo aktivnosti revidiranih subjekata preduzete u periodu **2023–2025. godine**, na realizaciji **ukupno 14 preporuka**. **Analiziran je rad ključnih institucija i tijela za ravnopravnost spolova i socijalnu politiku u Federaciji BiH**. Obuhvaćeno je 12 komisija i odbora za ravnopravnost spolova, Vlada FBiH, Gender centar FBiH, Federalno ministarstvo rada i socijalne politike, deset kantonalnih vlada i nadležnih ministarstava za socijalnu politiku, kao i deset centara za socijalni rad. Analiza je obuhvatila centre za socijalni rad u Sarajevu, Tuzli, Zenici, Mostaru, Bihaću, Goraždu, Travniku, Livnu, Ljubuškom i Orašju.

Rezultati praćenja pokazuju da je došlo do određenih pomaka u predmetnoj oblasti, ali preporuke i dalje nisu u potpunosti provedene. Većina subjekata odgovornih za njihovu realizaciju preduzela je djelimične aktivnosti.

U posmatranom periodu **uspostavljene su funkcionalne komisije i odbori za ravnopravnost spolova** koji su proaktivno djelovali na provedbi zakona i standarda u ovoj oblasti. **Značajno je unaprijeđen i zakonodavni okvir** kroz izmjene i dopune **Krivičnog zakona FBiH** te donošenje **novog Zakona o zaštiti od nasilja u porodici i nasilja prema ženama**. Dodatno, **kantonalni propisi su unaprijeđeni** kako bi se žrtve nasilja u porodici prepoznale kao korisnici socijalne zaštite.

Istovremeno, **uočeni su izazovi u planiranju i provedbi mjera** u oblasti rodne ravnopravnosti i sprečavanja nasilja nad ženama. Programi za prevenciju i borbu protiv nasilja u porodici i gender akcioni planovi **nisu se u svim kantonima donosili blagovremeno i redovno**. Također, praćenje implementacije gender akcionih planova i izvještavanje o njihovoj realizaciji **nije se provodilo kontinuirano, što umanjuje njihov praktični učinak**.

Postojeće evidencije o žrtvama nasilja nisu u potpunosti usklađene sa standardima Istanbulske konvencije, jer **ne obuhvataju sve oblike rodno zasnovanog nasilja**. **Kapaciteti centara za socijalni rad ostaju ograničeni zbog nedovoljnog broja stručnog kadra**. Nadzor nad radom sigurnih kuća zahtijeva dodatno jačanje.

Ured za reviziju cijeni da je potrebno poduzeti dodatne aktivnosti kako bi se realizovale date preporuke. Podaci o slučajevima nasilja nad ženama potvrđuju da ono i dalje ostaje najozbiljnija posljedica rodne neravnopravnosti, što zahtijeva dosljednu i efikasnu provedbu mjera.

Izvještaj revizije učinka dostupan je na internet stranici Ureda za reviziju: www.vrifbih.ba.



GENERALNI REVIZOR
Mirza Kudić